

SAN PABLO KARTA E'SU FXI'JNI TESALONIKA ÇXHABTEWE'SX JÏI

*Tesalónika çxhabte Dxus yakh
fxi'zesawe'stxi Pablöwe'sx fxi'jni*

¹ Pablo yaasesa naa karta's fxi'jaçthu Silwano vxite' Timoteo txäawe'sx yakh, yakhtë'jwe'sx Tesalónika çxhabte pkhaakhena üssawe'stxi weçxana. I'kwe'sxa' Dxus kwe'sx Tata vxite' kwe'stxi jxpe'jsa Jesukristo txäawe'sx yakh tx-utemée wala ew fxi'zena üsi'kwe. ² I'kwe'stxi' Dxusa' pu'çxhina vxite' kwe'stxi jxpe'jsa Jesukristo, txäa pa'ga Dxus yakhçxáa mfxi'zewe.

*Kristo' sxawedna kîhçxa Dxusna
nwëese'jsameewe'stxi kastigaîna*

³ Yakhtë'jwe'sx, i'kwe'sx pa'gate pejka Dxusa's weçxawa'j ji'ph yuhtha'w, txä'wë yūuni' kxulsame' naa pa'ga. Txäa pa'gatey i'kwe'sx ūusuh Dxusa's yaakxnisa' een isa jwee iîçxáa walaana u'jweça', naapkaçxha' teeçxsa na'wëçxah puutx ya'peeegāhna fxi'zewa'jwa jwee iîçxáa pehnana u'jweça'. ⁴ Txäa pa'gatha'w kwe'sxa' msuuwa Dxus luuçx pkhaakhena ūsnisu wët weçxana pta'sxi' i'kwe'sx ew fxi'zeni's. Txä'wë yuukahníi i'kwe'sxa' txakwe wala pkxuuni yahçena üsçxawa, Dxus yakh jxpubamée fxi'zewa'j yu'sa' wa'lmeei'kwe äate kaavxya'jaja'. ⁵ Dxusa' iiméh wala ewsa' na'

txãasa ne' txã'wē ew fxi'zewa'ja's i'kwe'sxtxi kaavxya'jaja', txãa pa'ga i'kwe'sxa' pkuuuni yahçena ũşçawa txajx jxkaahna ũsnite pa'jwa'jsai'kwe.

⁶ Nawa i'kwe'sxtxi pkuusáa yuutxi' ka'tuwa Dxus kastigãyni yuh yuutxna, ⁷ sa' i'kwe'sx nxuste fxi'zesa yuutxi' jxkaasewa'ja's ũsuna kwe'sx yã'jçxa, txã'wē Jesukristo' txajx angeleswe'sx yã'jçxa cielujũ kîhçxa, ⁸ Dxusna nwēese'jmeeçxa kwe'sxtxi jxpe'jsa Jesukristo's pta'sxni'swa nwēese'jsameetx kastigãyya' seena' ipx wala yakh kîhçxa txã'wē kwe'sxtxi jxkaasewa'ja's ũsuna. ⁹ Txãawe'sxtxi' Dxus jxkaahna ũsni tasxu txuhdeçxa bagaçxte yuhwa peena yu' Dxus yakh puutx uywa'jmeete nxuste kastigãyni yuutxna. ¹⁰ Naapkaçxha' na'wē kwe'sx pta'sxni's i'kwe'sx jxukaysa jxpa'gai'kwe txãa yã'jçxa vxite' Dxus luuçx jxukaysa yakh wala weçxana Jesukristo's jxpa'gasa yuune'kwe txajx sxawedna kîi ente'.

¹¹ Txãa sũhçxatha'w i'kwe'sx pa'gate Dxus yakh puutx we'wena nes yu', Dxusa' i'kwe'sxtxi pa'yayã'jçxa' txajx kusete jxpe'jna nes yuukahn. Sa' txã'wēy Dxus yakh puutx we'we'tha'w, Dxusa' i'kwe'sxtxi peeygãawa'ja's pu'vxitumée kxtey yuuçxa txãa yakh jxpubamée fxi'zewa'ja'swa jxuka pu'çxkahn, ¹² kxah kwe'sxtxi jxpe'jsa Jesukristo's tuuthe'jsa yuune'kwe, naapkaçxha' i'kwe'sxa' Jesukristo tuuthe'jni yuune'kwe naasáa kwe'sx Dxus vxite' Jesukristo peeygãapa'ga yuuçxáa.

2

Teeçx piçthê'j iiméh seena' kazx pkalsa vxyaana

¹ Nawa ãçxha' kwe'sxtxi jxpe'jsa Jesukristo kwe'sxtxi pkhakhya' kiiwa'ja's pta'sxiçthu, yakthê'jwe'sxtxi wala neewe'wena. ² I'kwe'sxa' thëymée yu'pthehna üsnuwe, isa yuhwáana sũhna ũukhna, txã'wê Jesukristo kiiwa'j ena' ãjxã'kh jini's, meeçxawa Dxusku vxyaaçxa txã'jĩkaja' jiwáatxna, meeçxa' Pablok txã'wê pta'sxkaja' jiwáatxna, nmehte' kartawa kwe'sx fxi'jni na'wëysaçxawa ïsxiinisa pa'jawáana.

³ Nawa weh yuhwa jxpubanuwe ïsxiini's. Txã'wê jxpubakahmén Kristo kiiwa'j en ãhmeyna nyafxte' Dxusa's uy wëemée ahçeçxa txãa yakh puiiwa'j en khuê'y u'puna, naapkaçxha' teeçx piçthê'j eçxthê'j na'wëy iiméh seena' kazx pkalsa infxiernote akhni yuuwa'jsawa vxyaana. ⁴ Txã' kihnawa jxuka açesa yuuna Dxus yase's kxsuusni yu'sa', sa' dxuus yatte u'kaçxa kaçxhiina, adxa' Dxusthu jina jxkaajxa'.

⁵ Adxa' kxtee i'kwe'sx yakh nee üsiy pta'sxthu txã'wê Dxusa's açesa pa'jwa'ja's, aç'a' ¿yaaki'çmeekwe'? ⁶ Txã'wê yuuwa'j en ãhmeyna, txãa ewmeesa kasehwe'sxte kĩh txã'wê yupna üstewa txã'sa' jii i'kwe i'kwe'sxa'. ⁷ Txãa ewmeesa' paaçte mjina yã'j üsa', aç'a' naasáa txãa ewmeesa's yupna neewesa's kutxi'jwa'jçxáa yã'j peejxa'. ⁸ Txajũ isa txãa ewmeesa' ãate vxyaana, nawa Jesukristo' txajx we'wenijuçxáa naa dudte ikhena, sa' peena

yu' kaavxya'ja'jmeena eena' kweethna kīini yakh. ⁹ Txāa kazx ewmeesa' eçxthē'j kaahni txā'wē pa'jana, txāasa kim yuhwa ājanimeesa's kaavxya'ja'jana īsxiina kaypuba'jna. ¹⁰ Sa' Dxus yuwe isasa's pta'sxni's jxpa'gasameetxi' thēymée kaypuba'jana ewmeesaçxá's kaavxya'ja'jçxa. ¹¹⁻¹² Txā'wē Dxus yuwe isasa's pta'sxtewa jxpa'gamée īsxiina pta'sxniçxá's nwēese'pha'ga, Dxusa' txāawe'sxtxi' jxpubakahn nvxiituna vxituwa'jsa yuukahn.

Ewte neeyūwa'jsatx Dxus txhitxhnisa

¹³ Nawa kwe'sxa' багаçxtewa Dxusa's weçxawa'j ji'ptha'w i'kwe'sx ew fxi'zepa'ga. I'kwe'sxa' Jesukristo peeygāanisai'kwe, txāa pa'gatey Dxusa' nyafxiitey txhitxhku i'kwe'sx ewte neeyūwa'jsatx, aça' Dxus Espiritu' pkal ji'phmeesak vxitna pa'j yuwe ewsa's jxpa'gapa'ga. ¹⁴ Txā'wē yuuya'k Dxusa' pa'ya yuwe ewsa kwe'sx pta'sxpa'ga, kxah kwe'sxtxi jxpe'jsa Jesukristo ūsnite pa'jya' ājakahn.

¹⁵ Txāa pa'ga, yakthē'jwe'sx, weh yuhwa jxpubamée meswe, na'wē i'kwe'sx yakh ūçxa kaapiya'tha'w sa' kartatewa fxi'jna pta'sxtha'w txāatx peçxkanamée. ¹⁶ Kwe'sxtxi jxpe'jsa Jesukristo vxite' Dxus kwe'sx Tata peeygāhçxa багаçxte yuhwa pçuwa'jmée weçxana ūswa'ja's ūsku ¹⁷ txāa i'kwe'sx ūustxi kçxhāaçxha'jana, aça' kīhwa ewçxāa yūuna fxi'zene'kwe, we'wewa'j ma'k yuu nawa ewsaçxá's puutx we'wena.

3

Dxus yakh mpuutxwe'wewe kwe'sxtxi neewe'wena

¹ Nmehte', yakhtē'jwe'sxtxi na'wēth neewe'we': I'kwe'sxwa ma'wēkwe Jesukristo pta'sxni's weçxana jxpa'ga txã'wēy msuuwe'sxwa jxpa'gakahn Dxus yakh mpuutxwe'wewe kwe'sx pa'gate, ² kxah nasa ewmeesa kuseju iyu'nja'w. Txã'wēme' jxukaysa yu' Dxusa's yaakxsameeta'. ³ Txã'wētewa Jesukristo' bagaçxte yuhwa i'kwe'sxtxi' nvxihtmée ewmeejũ nwe'wena kçxhãçxha'jana. ⁴ Kwe'sx pta'sxni's na'wē yũuna ũsi'kwe txã'wēçxáa nes yuukahn Jesukristo' pu'çxhina sũju'tha'w. ⁵ Sa' Dxus peeygãani's peçxkanamée yaakxkahn, Jesukristo' kaayaki'jna nes yuuna txãa na'wēy çxhãçxha fxi'zekahn.

Mjüwa'j jì'pha'

⁶ Yakhtē'jwe'sxtxi Jesukristo jxkaahni's neewe'weçtha'w: maa yakhtē'jwa mjüimeena sa' kwe'sx kaapiya'jni'swa kxtey yuumeena aç'a' txã'wēsa yakha'pkhaakhenuwe. ⁷ I'kwe'sxa' jii i'kwe'kwe'sxa' ma'wē yũuna fxi'zesatewa. Kwe'sxa' i'kwe'sx yakh ũsçxa', mjüimée yu' fxi'zemeetha'w. ⁸ Sa' ũ'a's dukhmée yu' fxi'zemeetha'w, wejxwa en ma'k yuu kus ma'k yuu nawa wala çxhãçxha mjüitha'w i'kwe'sx maa yuhtxwa thãasya'mée. ⁹ Txã'wē yũu wēemeewaça', kwe'sxa' i'kwe'sxtxi pu'çx thãasya' ãjawa'jsatha'w yu'. Nawa txã'wē pu'çx thãasmée mjüitha'w, i'kwe'sxwa

kwe'sx na'wěy yūuna fxi'zekahn. ¹⁰ Txã'wě yūukahmení kwe'sxa' kxtee ũsçxa' na'wě yūuwa'ja'stha'w nvxiht: Mjīiya' wa'lsa', ũ'wa'jme' jīna. ¹¹ I'kwe'sx yakh ũssa maái yu' kīh yuhwa mjīimée ewmeeçxáa fxi'zena yuwe ksusu'jna fxi'zewa'ja'sçxáatx yaaki' jīnatx pta'sxi'. ¹² Jesukristo jxkaahni'stha'w juuna' we'wena jxkaaja' txã'wě yūusatxi', kxah txāawe'sxa' çxhãçxha mjīiçxa peekx ũ'wa'ja's uyuutxna.

¹³ Yakhthě'jwe'sx, i'kwe'sxa' ew yūuwa'j yu'sa' wa'lnuwe. ¹⁴ Meeçxa' maái yu' kxtey yu-umeewáatxna na'jīna fxi'jaçtha'w txã'sna aç'a' maa txã'wě yūusatewa ew jiyuçxa, txāa yakh pkhaakhenuwe, kxah thaameetxna. ¹⁵ Nawa puuisáa na'wě yu' yuunuwe, wejxwa zhiçxkwe myu'kxpehwe, ma'wěçxawa yakhthě'ja' naa pa'ga.

Dxus yakhçxáa fxi'zewa'ja's neewe'weni

¹⁶ Kwe'sxtxi jxpe'jsa Jesukristo' i'kwe'sx wět fxi'zewa'ja's ũsuna bagaçxtewa, ewçxáa kaafxi'ze'jna. Dxus yakhçxáa mfxi'zewe.

¹⁷ Pabloth txã'wě weçxana fxi'ja' adx kuseju. Adx kartatxi' txã'wěçxaçxáath adx yase's ki'pna fxi'ja', txāasath na'snawa txã'wěy fxi'ja'.

¹⁸ Kwe'sxtxi jxpe'jsa Jesukristo' pu'çxhina i'kwe'sx jxukaysatx.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd